

摘藻堂四庫全書薈要

集部

欽定四庫全書薈要

集部

元詩選初集卷五十九
六十

詳校官候選知縣臣吳甸華



欽定四庫全書薈要卷二萬四百十九

集部

元詩選初集卷五十九 長洲 顧嗣立 編

郭鈺靜思集

鈺字彥章別號靜思吉水人壯年盛氣負竒適當
元季之亂晚際明興以茂才徵不就年逾六十竟
以貧死其春夜寒詩序云余值時危一窮到骨薪
米不給恒自謂不敢僥倖今春雨雪連旬擁牛衣
以當長夜寒砭肌骨遂成疔瘡其詩云少壯幾時



頭欲白夜闌山鬼瞰孤燈亦可哀已靜思詩清麗
有法格律整嚴其於離亂窮愁之作尤悽惋動人
殆所謂詩窮者歟嘉靖間八世孫廷昭哀集其詩
刻之羅念菴曰靜思爲吾族志行之甥經歷艱難
閭里流離之狀皆目見之當時故實可裨野史其
贈吾族秀賓詩有云聖賢去我遠縻茲糟粕味當
其得意時何如卿相貴嗚呼此詩人所以窮餓終
身而不悔也念菴此言可謂深知靜思者

題郭伯澄西崦山居

白日上東山晴光射西崦西崦山人開曉關一襟煖翠
濃如染門前流水玉虹明樹上啼鸞金羽輕自掃落花
客初到共題修竹詩先成十載戰塵迷道路西崦只今
成久住移竹春深長子孫種梅晚歲爲賓主丈夫揚眉
天地間山林朝市俱等閒出爲公卿入爲士古人高節
非難攀聞君近年深閉戶烏帽青燈讀書苦劒寒新淬
冰雪光松老終無棟梁具西崦山深竹徑微我來欲共

薜蘿衣一朝富貴逼君去燕雀空羨冥鴻飛

採蕨歌

朝採蕨南山側暮採蕨北山北穿雲伐石飛星裂手脚
凍皴腰欲折紫芽初長粉如脂瘦根蟠屈蛟蛇結吞聲
出門腹已饑猿啼風擺藤蘿衣長鏡短笠日將莫攀援
垠塢何當歸朝採蕨莫採蕨東鄰老翁更悽惻抱蕨轉
死長松根妻子眼穿淚成血情知世亂百憂煎得歸茅
屋心懸懸癡兒啼怒炊煙晚打門又索軍需錢君不見

將軍擁旌節紅樓夜醉梨花月

題秋江送別圖送楊亨衢少府參安成軍事

楊少府紫駟馬黃金鞭團花戰袍繡兩肩腰下雕弓懸
迴若秋鷹解條鏃縱之颯颯凌千仞之蒼煙酒酣拔劍
玉龍舞喝令西飛白日回中天簸海腥風白波立壓空
殺氣玄雲連線緣邊諸將亦無數晝擁旌旗夜撾鼓豹韜
合變待參謀太守掄才君獨去送君江上君甚歡江風
吹雪蘆花寒知君心事如秋水故應寫入畫圖看問誰

畫者謝君績不畫琵琶美人泣舟子揚帆發棹歌主人
解劍停盃立我亦從軍今四年男兒姓名何足憐老親
白髮長相憶只得還家種薄田

送友人從軍兼呈謝君績參軍

歎息復歎息歎息長書空殺賊五年無寸功今者又送
君從戎七星戰袍襯金甲三山尖帽飄猩紅牙旂曉發
玉花驄猛士雙劍立西東爺娘妻子不用哭上馬更勸
黃金鍾黃金鍾琥珀濃豪氣千尺搖晴虹明日軍門揖

主將論軍未可皆雷同安成之寇容易攻廬陵凋弊遺
民窮自非竒謀決擒縱煩費日久誰當供君家伯仲盡
少年正好變化扳飛龍頗聞幕府多才雄爲我問信毋
怱怱我有大羽箭不殺南飛鴻要如魯仲連繫書射入
聊城中祇緣骨相不受封不如扁舟歸去長伴滄浪翁

貽郭恒

月懸松露明鷓啼浦煙破遙想山中人此時正思我我
行忽墮滄江邊度盡春風無一錢向來自是釣鼈客至

今思拍洪崖肩洪崖不可招蓬萊在何處鋪遍閒愁芳
草路千樹綠陰晝如雨錦字書成人不來銀燭花殘誰
與度近日聞君多好懷雪色白紵佳人裁小樓紈扇低
徘徊釀酒好近榴花開榴花開我歸來

母棄子同劉茂才賦

母棄子子幼情可憐子長母還去爲子宜思愆龍爭虎
鬪事翻覆寶玦王孫捐骨肉十年母子安茅屋菽水真
情無不足奈何一朝辭故幃子也慟哭牽母衣母今棄

兒不敢怨父在深恩母當念母如不聞竟不畱黃昏門
掩青燈愁負米歸來飲殘泣他家兒女何綢繆噫噓噓
邇來萬事足悲咤負德辜恩滿天下丈夫盡爲溫飽謀
婦人何得毋重嫁

龍伯淵席上和周子諒長歌兼呈諸君子

伯夷登西山魯連蹈東海烈士懷苦心海枯石爛終無
改蕭蕭華髮吹秋霜夜煮白石充饑腸人情俯仰今異
昔惟有青山似故鄉桐江江上一攜手公子華筵誰不

有賦筆每慚崔顥詩持盃願飲茅容酒銀燭花高照坐
空笑談頗有前賢風好懷傾寫向誰是或執螭蜺嘲神
龍老我踈狂眼常白欲麾凍蠅清几格不須浪說管鮑
交眼中誰有真顏色百年聚散如搏沙東風燕子還西
家羣仙天上擷飛霞君歸好醉瓊林花

題劉履初所藏莫慶善鷹

日光懸秋雙翮齊欲飛不飛愁雲低足無條鋏腹無食
空林尚恐難安棲筆力精到天機微莫生所畫詩我題

君不見天下太平角端語狐兔草間何足數

控郎馬酬別蕭茂才

控郎馬妾心悲畱郎駐郎苦辭少年只願封侯早不惜
蛾眉鏡中老銀鞍金勒珊瑚鞭白水青山千里道控郎
馬郎駐鞍郎飲莫須盡酒醒郎衣寒郎心懸懸五雲下
教妾若爲控郎馬馬蹄好向御街行蛾眉不向妝臺畫

長相思

長相思相思者誰自從送上馬夜夜愁空幃曉窺玉鏡

雙蛾眉怨君却是憐君時湖水浸秋藕花白傷心落日
鴛鴦飛爲君種取女蘿草寒藤長過青松枝爲君護取
珊瑚枕啼痕滅盡生網絲人生有情甘白首何乃不得
長相隨瀟瀟風雨啞啞鳴鷄相思者誰夢寐見之

瑤花

花白色而變
殘紅而碧

瑤臺仙子初相見迴立天風飄雪練東華夢破歸去遲
素衣總被緇塵染芳心不委春蝶狂水晶簾捲凝清香
臙脂洗紅畱殘暈海雲翦碧浮霓裳揚州瓊花舊同譜

零落誰知到南土聞君愛花最有情
亭臺五月清無暑君不見花開今日多
有酒不飲君如何

秋夜讀劉昕賓旭子夜歌因效其體賦二首

子夜歌歌罷其如明月何牽牛織女永相望不教精衛填銀河妾心本如秋月白妾顏不共春風發玉兔擣藥三千年近見嫦娥搔白髮

子夜歌承君蛺蝶雙花羅羅衣秋來不堪著梧桐樹上涼風多銀燭作花好消息又想歸期在明日并刀不剪

相思愁相思誤盡曾相識

同李主敬賦周鍊師漁樵耕牧詩四章

子何為漁碧海之丘長虹爲綸月爲鈎六鼇昂首相向
愁眼看海水不揚波扁舟穩繫珊瑚柯邂逅徐家兒與
女拔劍屠龍共君煮煙淡淡雨疎疎人間彈鋏食無魚
吁嗟歸來乎吾與爾漁

子何爲樵閬苑之東瓊林玉樹朝露濃攜斤盡翦荆榛
叢松下童子知何客長日圍碁看不得笑殺吳剛愁滿

霜千古桂枝礙明月石磊磊路迢迢人間饑火燒心焦
吁嗟歸來乎吾與爾樵

子何爲耕瀛洲之曲玉山分雨秧苗綠蒼龍爲耘虎收
穀炊煙晨起蒸爲雲銀河晝洗塵沙昏釀成九霞爲君
壽何必休糧苦長瘦樹陰陰草青青人間作苦秋無成
吁嗟歸來乎吾與爾耕

子何爲牧蓬萊之麓自駕青牛度函谷鶴羣鹿子還相
逐芝草松間長未齊紫苔竹下行迹迷南山羣羊化爲

石日斜歸去空無攜水泠泠山簇簇人間歧路往還復
吁嗟歸來乎吾與爾牧

簡王志元二首

戰塵暗南國白日無晶輝客行何慘戚途窮不忘歸語
及國家事老氣晴虹飛朝飲南山水夕採西山薇嗟彼
反側子捐軀逐輕肥寒餓良細事大義有是非

海月上蒼茫照我中庭正香霧出簾遲微風動花影泠
泠綠綺琴拂拭塵埃淨一彈作新聲再彈成雅韻三彈

曲未終感激誰與聽肅衿遲子來無負春宵永

同周愷子諒賦老人會詩

時危親戚散况乃多賤貧矐茲老人會爲樂難具陳
生子競榮達志養俱獲伸朝出共寮寀夕歸爲比鄰
異姓歡愛洽不殊骨肉親起居迭相送惋愉盡情真
繫我豈無母半菽長苦辛願言敷治化枯槁皆同春

濠石晚樵因簡李撫伯謙

出山復入山流泉遞迎送暝入黃葉深溼分白雲重棘

荆攢逕危側身抱深恐春花自芳妍春鳥自鳴哢悠悠
徒旅間何由免寒凍老親嗟我勤歎息中腸痛肩頰只
自憐囊罄當誰控學劔惜已遲讀書亦何用國步政艱
危高官選才勇李君舊知己風格鬱清聳光怪匣中龍
文采雲間鳳庭幃壽且康甘旨日相奉避地雖云同樂
事誰能共知君懷遠略臨機不妄動戰爭奈未已發策
必竒中何當展才力青雲縱飛鞚

悲廬陵

并序

至正十六年丙申冬袁州兵逼城屯藤橋丁酉正月義士廬陵陳瓘出屯城北之青湖二月吳都事命兵校明某下桐江計事不報入蘭溪召不至五月桐江李彬誅六月袁州兵退秋明某歸遂以其屬屯太和之永和十一月明某矯殺騎將林伯顏武端不問十二月全參政笞其部將某某戊戌正月朔庚子戊午參政兵亂逐鎮撫吳林三月梁太守卒安成兵自去冬侵掠北境旦莫至四月至桐

江五月初四退初十戊申分宜義士袁雲飛導湧
兵至桐江己酉義士劉照與戰於吉水之灘頭庚
戌明某以都事之衆降辛亥傳于城錄事張元祚
與攝監郡雅某降全參政奔贛裨將裨將降叅謀
鄉貢進士吉水蕭彝翁死之是日陳瓘召安成兵
入城六月吳都事將其屬居吉水之蘆兜此吉安
再陷之略也

峩峩青原山洋洋白鷺水炳炳照輿圖磊磊足多士四

忠與一節流風甚伊邇徃徃舉義旗事由匹夫始連兵
七年間省臣兼節制朝廷寄安危幕府保姦宄勢驕改
令圖反側久窺伺紅旂遡江來羣雄盡風靡今日賣降
人昨朝清議子奈何英雄姿因之穢青史朝爲龍與虎
夕爲狗與彘流芳動百年遺臭亦千祀嗟余父母邦何
忍獨深訾所恨寧馨兒磔磔不得試賴有蕭參謀殺身
刷深恥我欲裁白雲緘情問生死哀歌裂肝腸臨風淚
如洗

送羅彥思往閩中候迎大父

天倫有真樂家慶傳新圖人生百年內於焉始爲娛爾
翁老京國風霜搖鬢鬚爾父奉慈幃干戈沈里閭豈無
饘與粥朝夕不得俱眼穿孤飛雲心折反哺鳥近者消
息真萬里神明扶沈思供子職內外懸君軀投袂出門
去父命何勤渠朝迎莫望返少壯輕畏途見翁問起居
同舍相驚呼孫已如翁長子應似翁臞時危久離別會
面當何如歸期諒不遠春酒爲君酌再拜千歲壽親戚

多歡愉卿相何足道勝事世所無願言慎前路明發毋
躊蹰

早秋陪楊和吉曉登前山望桐江

白鶴導晨從涼颺起林杪振衣凌高岡極目窮幽眇蕭
蕭草樹秋厯厯人煙曉依微玄潭觀羣仙在林表下有
塚纍纍世事誰能了桐江匯章水晴漲何渺渺曾不瞬
息間一帶縈沙小無怪豪傑區煙蕪怨啼鳥盛衰兩相
乘玄悟良獨少君今脫塵羈相從得閒眺題名剡石苔

借陰憩叢篠白紵含餘清稍覺心情悄山市門初開飛
塵已紛擾

秋夕王楚善過宿

片雨灑空庭梧桐響殘滴窻戶涵清風孤燈夜寥闌渺
懷平生親睽違不相識公子幸過從爲之長歎息意曠
塵慮空語到聰明入山逕披榛蕪晤言永今夕物變心
自傷事往嗟何及遠大與子期無踵炎涼迹

送別李騰還鄉

別離古云苦况值兵未休
慈烏夕反哺蝮蛇寒出遊
料事每成錯去住難自謀
東風捲飛雨添我雙淚流
憑君見親舊道此情悠悠

黃氏容安樓

君家高樓高百尺樓間把酒無虛日
極目欲窮千里心誰謂區區僅容膝
捲簾半空雲氣入孤鶴長鳴楚天碧
醉拍闌干呼月來萬壑松風夜吹笛
天上玉京十二樓羣仙不帶人間愁
曉飛霞佩來相訪攜我共作丹丘遊

今日之日君我畱爲君題詩樓上頭笑指樓前大江水
古今人物共風流

賦清溪

清溪之水抱幽谷盤渦細浪相逐蹙半篙晴日蕩金鱗
一帶秋煙溜寒玉溪上仙翁絕塵俗開門俯溪飲溪綠
白鳥飛來明鏡中垂楊鎖斷闌干曲窈窕春花亞修竹
修竹何人共碁局紫蘿爲蓋草爲褥如輞川圖懸一幅
嗟我早年厭羈束五湖風月醉心目祇今是處沸鯨波

把釣從君事亦足

秋塘曲

高荷擁翠秋滿塘
花開不見聞花香
老魚吹波紫萍碎
花下飛起雙鴛鴦
鴛鴦相逐低回翔
藕絲易斷愁心長
玉箏不彈轆轤悄
一簪華髮凝秋霜

冰山謠

黑風颯颯海波立
冰山嵯峨聳千尺
樓觀晴連蜃氣高
金銀夜貫虹光赤
上有異物騎於菟
左手鞭熊右麾羆

彎弓射天鬼神泣憑陵殺氣搖荆吳狡兔爰爰何所得
百計穿窬作三穴父老相逢不敢言夜對妻孥淚成血
一朝白日中天開冰山融液非人推淋漓后土滿泥滓
笑聲變作啼聲哀前者已傾後者踏出門却恨乾坤窄
秦關逆旅商君愁楚國飛車觀起裂早知冰山不可保
何不委身平地好從今寄語問津人風雨西山薇蕨老

美人折花歌

美人折花粉牆曲花前背立雲鬟綠乍愛薔薇染絳霞

還惜海棠破紅玉素手纖纖羅袖殷
情凝想金刀寒
低枝未吐精神少
高花開遍顏色殘
花刺鈎衣花落
手
草根露溼弓鞬繡
紫蝶黃蜂俱有情
飛撲餘香趁人久
情知人老不似花
花枝折殘良可嗟
明朝棄擲妝臺側
綠陰青子愁天涯

送遠曲

爲君治行近一月
今晨竟作怱怱別
枕邊紈扇鏡中花
一時盡變傷心色
妾雖不見邊城秋
君亦不識空閨愁

憶君便如君憶妾雙淚豈爲他人流才貌如君長刺促
少年心事何時足歸期未定須寄書誤人莫誤燈花卜

悲武昌

武昌兵甲雄天下王孫節制何爲者白馬將軍飛渡江
壯士彎弓不敢射王船未過鸚鵡洲紅旂已簇黃鶴樓
美人散走東南道一絲楊柳千絲愁戰鬼銜冤夜深哭
王孫獨在淮南宿淮南美酒不論錢老兵猶唱河西曲
九江昨夜羽書傳九江太守愁心懸焉得將書報天子

哀哉不識顏平原

郭恒惠牙刷得雪字

老氣稜稜齒如鐵曾咀姦腴噴腥血倦游十載舌空存
欲挽銀河漱芳潔南州牙刷寄來日去膩滌煩一金直
短簪削成玳瑁輕冰絲綴鎖銀駿密朱脣皓齒嬌春風
口脂面藥生顏色瓊漿曉嗽凝華池玉麈晝談灑晴雪
輔車老去長相依餘論於君安所惜但當置我近清流
莫遣孫郎空漱石

贈彭將軍

將軍昔從布衣起，便欲賭命報天子里。
中父老得開顏，刺虎斬蛟良細事。
幾年汗馬鏖戰塵，君門九重誰得陳。
羽檄飛雲白日莫，牙旂捲雨滄江昏。
中書大臣擁貔虎，吐氣如雲蓋南土。
豫章城頭鳴老鴉，匹馬夜出杉關去。
楚山蒼蒼楚水清，草莽之臣何重輕。
但得嚴君脫虎口，皇天后土相知心。
誰想長材不終棄，控搏造化真兒戲。
東鄰早結丞相歡，種瓜不到青門地。
君家屋前山水幽。

正好歸來尋舊遊
座上衣冠戲綵日
牕前燈火讀書秋
我欲從君語疇昔
悠悠世事嗟何及
滄波東逝魚西飛
獨振布袍三歎息

負薪女

山下女兒雙髻垂
上山負薪哭聲悲
辛勤主家奉晨炊
主翁頭白諸郎癡
干戈未解骨肉離
生來不識妍與媸
長笑鄰姬畫蛾眉
金屏孔雀何光輝
琬弓羽箭來者誰
綠楊終日青驄嘶
人生年少如駒馳
鴛鴦翡翠皆雙飛

愁思百結心自知負薪拭淚背人揮黃昏四壁寒螿啼

題秋山風雨圖

平生最愛米家畫君之此圖妙天下鳥分歸路雲不開
樹壓懸岸雨如瀉倚江茅屋何人住蘆竹蕭蕭出無路
似我還山煙雨中愁來只讀秋陽賦

從軍別

將軍披甲控紫騮美人挽轡雙淚流六月炎埃人命脆
軍期稍緩君須畱彼爲兄弟此爲仇朝爲公相夕爲囚

歲歲年年苦征戰黃金誰足誰封侯煙塵暗天南北阻
英雄盡合回田畝當時兒戲應門戶不謂虛名絆官府
馬鳴蕭蕭渡江浦重喚奚奴再三語將軍臨陣爾爲御
莫把長鞭鞭馬去

和荅銓弟

弟云在贛日有誦爾
詩兩辱問起居者

別來兩見春日滿愁思誰云春夜短十八灘頭鳴棹歌
吳姬勸酒銀瓶煖中江開帆先到家意濃不計歸程賒
但云老兄久埋沒詩句何得隨飛槎諸公傳誦無新舊

相憐似是平生友，事業青雲如鼠肝。
文章白髮羞牛後，長年凍餓茫無涯。
不敢仰天生，怨嗟先生歸去且種菊。
詞客愁來空饅瓜。

猛虎行

猛虎長嘯風滿谷，十載山中往來熟。
朝瞰牛羊莫殺人，眈眈不畏弓刀逐。
山翁死後空茅屋，山下行人早投宿。
妖狐憑威作人語，跳梁白日欺樵牧。
南來壯士怒相觸，彎弓射虎穿虎腹。
閃爍雙睛甘就戮，髑髏作枕皮爲褥。

人生何必書多讀能事自足驚殊俗何當更斬長橋蛟
老夫雖死關心目

贈劉子倫

廬陵周愷文章伯語語談君不易得嗟余終日走風塵
到今未覩眞顏色聞君早歲抱竒節胸中磊落太平策
玉龍霜冷光欲飛蒼隼秋高影孤掣交游四海多才傑
自合貢之天子闕綵筆題詩衡岳雲畫船撾鼓西湖月
衣冠王謝自風流賓客秦黃最超越往年仗劔奮忠烈

戰袍紅濺猩鼯血，草檄未吐陳琳詞。
種柳已近淵明宅，酒酣氣漲漱天風。
一聲長嘯層崖裂，登山臨水憺忘歸。
聽雨看雲頗愁絕，茫茫世事應難測。
英雄莫遣頭空白，寒盡春生剗雪霜。
海闊天高排羽翮，何當攜手銅駝陌。
蓬萊羣仙朝帝側，醉浥溟波鱸六鰲。
老懷浩蕩從君說。

滄洲灌夫詩爲周子諒賦

往年曾踏滄洲路，滄洲仙人畱我住。
紫霞裁翦成春衣，到今挂在珊瑚樹。
十載人間走塵霧，惟愛周郎讀書處。

雲氣寒深連竹松江波晴漲搖窻戶清曉中庭遺鶴羽
太乙青藜夜相語晚菘春韭東西畦鳥啼桑陰日當午
浦雲分送疎疎雨抱瓮歸來不知苦嗟我已負滄洲期
羨君獨得滄洲趣江山今古武陵源姓名伯仲蘇公圃
畦外有田多種黍長使糟牀壓香醕招隱先須招我來
到門不用分賓主

葵花歎

朝見葵花長歎息莫見葵花重於邑白日攜光萬彙蘇

寸心炯炯誰能識蠟光膩粉花正開翠袖捧出黃金盃
再拜君王千歲壽六龍迎駕扶桑來朱門厭逢車馬客
移花遠置山巖側不辭辛苦灌葵根遮莫浮雲翳空碧

桐江宴集和周子諒韻

岸巾長嘯吾與君讓君筆力飛春雲蒹葭枯折吳江濱
芝蘭却許濃香薰今夕何夕歌聲聞江山重到吾已老
慚愧詩成瘦如島坐中少年美詞藻琪樹交花照晴昊
懷抱一時盡傾倒玉瓶行酒盃如飛爭雄得雋酒滿衣

持觥御史令莫違斫魚烹鴈頤指揮荊州吾土還相依
江上雲荒月欲爛客囊空貯閒愁滿不謂相逢重展轉
交情豈必論深淺黃鵠一飛天地遠

送宋仲觀迎親江陵

戰塵飛空暗南北出門每恨山河窄况復荊州千里遙
君家嚴親久爲客天南鴈杳音塵絕十七年間愁百結
昨者忽傳消息眞健步如仙髻如雪上堂白母喜欲顛
明朝便買西江船奉迎歸養無不足高官可棄金可捐

東鄰失子西失母君家具慶寧非天別君豈必送行曲
望君却賦歸來篇舊聞荆襄樹旗羽客行不免多愁苦
嚴君能保千金軀豈無歸夢到鄉土老大還家樂且閒
溪柳山花總如故君今去去須早歸白髮慈親倚門莫

題李尚文少府所藏枯柳寒鴉圖

江邊獨柳飛羣鴉敗枝殘葉秋風斜石泉可飲不可啄
似聞落日鳴啞啞一段淒涼幽思足忽憶看花過韋曲
上林春早聽啼鴛太液波晴寫黃鵠

征婦別

征婦臨行曉妝薄上堂辭姑雙淚落含情欲訴哭聲長
一段淒涼動林壑從夫不辭行路羞婦去誰爲養姑謀
婦人在軍古所忌今者召募如追囚十年婦姑共甘苦
一室倒懸空四顧小郎早沒更無人却把晨昏託鄰婦
情知送兒是埋兒姑年老大莫苦悲萬一軍中廢機杼
減米換衣當寄歸小旂叫呼催早別出門便成千里隔
今夜不聞喚婦聲愁心共挂天邊月

題蕭質所藏終南雪霽圖

玉龍銜燭晴光吐怪底空檐響殘雨南山一夜服還丹
滄浪之髭總如故公子昨朝愁出戶錦袍圍春醉歌舞
赤脚老樵拾斷薪畫史何由得深趣早梅回煖動精神
凍雀翻叢動毛羽筆端生意開紈素恍然不計寒宵苦
泥滑迢迢江上路行客茅檐不少住世間捷徑渺何許
已有扁舟候江滸隔浦長橋似灞陵何如著我騎驢去
黑貂擁醉詩思多明日歸來爲君賦

春莫吟

玉壺酤酒青絲絡啼鳥勸人滿盃酌落紅滿地暗香消
溼翠如煙午陰薄畫樓玲瓏隔彩霞樓前雙鵲鳴喳喳
想見吳帆北風起王孫明日當還家

荆軻詞

燕山雲飛青宮閉毳毼夜煖沈沈醉北斗黃金何足多
一筋深恩美人臂寒風蕭蕭度易水匕首光芒泣神鬼
畢竟明年祖龍死恨不報君爲君喜

張良詠

韓成未死思報秦漢燒棧道吾兵神韓成已死思報楚
始知漢王乃天與昨日相從赤松子今日已見淮陰死
控御天下漢業崇不受控御眞英雄

王猛詠

五馬渡江老臣泣垂死丹心在王室當年非不思南來
王謝豈能生羽翼魏相張儀尚爲秦聊借羌苻展才力
江南雖僻不可圖青史千年誰獨識

春夜吟

月色如水花如雲美人樓上歌迴文棲鴉飛起玉階樹
香風吹動殷紅裙去年寄書到君側書中只寫思君切
情知人老髮如絲君歸不恨緣君白插花記月夜未央
他人苦短我苦長若使驅車到家日天涯芳草路茫茫

狂客行

美人當牕捲珠箔狂客花陰彈黃雀黃雀低回嬌不飛
金丸偏著搔頭落與君未展平生親奈何調笑如無人

萬一樓頭是夫塔百年恨怨將誰陳君心誤認雙蝴蝶
搖蕩迷魂招不得

射虎行贈射虎人

昨日射虎南山顛悲風蕭蕭眼力穿今日射虎北山下
虎血濺衣山路夜朝朝射虎無空歸家人望斷孤雲飛
度嶺踰山弓力健虎肉共分不辭遠府司帖下問虎皮
高枕髑髏醉不知虎昔咆哮百獸走一死寧知在君手
鼻端出火耳生風拔劍起舞氣如虹昨夜空邨見漁火

牛羊不收犬長卧作詩贈君毛髮寒煩君爲我謝上官
君不見昔日劉昆稱長者虎北渡河不須射

秋望

長嘯動巖壑秋風生滿林片雲隨鴈度疎雨約蟬吟燕
馬關山遠吳船歲月深歸來蘇季子何用苦多金

從軍

減袖作戎衣爲儒事却非心肝同感激名位却卑微
浼黃塵合悠悠白旆飛將軍先陷陣奪得紫駟歸

苦雨

雨寒滯茅屋昏曉候春晴
欹枕江聲近捲簾雲氣生
花開從過眼麥倒最關情
况復轉輸苦邊隅未息兵

入城

不見平安報酸風雜鼓鞀
雨寒催日短雲黑壓城低
枕席啼痕滿鄉關去路迷
將軍多異見誰與慰烝黎

復愁

猛士憑城險四郊
今若何纔聞一馬獻
已費百金多江

雨舟無渡山雲鳥獨過君王不相負諸將且須和

歲除前三日

一歲餘三日還鄉鳥道通論兵無衆寡決勝在英雄短
髮思親白衰容待酒紅出門親舊滿共訴客囊空

王志元邀度歲不及赴敬荅以詩

東門問來使晚歲許相迎野樹懸雲氣江波挾雨聲虎
饑寒更出驢瘦滑難行好是城南酒燈前只自傾

除夕

短日如年度寧知歲又殘鄉關一水隔風雪五更寒寄
食囊垂罄更衣帶盡寬主人供帳好獨作太平看

江路

江路雪稜層囊空仗友朋炊煙晨減米乞火夜分燈白
鳥踰青嶂蒼松舞翠藤鄉關長在望歸夢久無憑

憶弟

時危思共濟謀拙阻相聞念母誰無子持家爾不羣江
煙寒織雨山鳥暝穿雲悵望歸無計悲啼向夜分

和王志元雨晴

客枕愁春雨漁歌荅晚晴殘雲棲樹溼新水與橋平
穉子買魚至主人窺筍生酒來卽傾倒何問阻歸程

春雨

日夜雨懸懸問春春可憐好花俱薄命似我負芳年
雲氣低簾外江聲到枕前何時是寒食早已禁厨煙

哭吳林鎮撫

幕府十年別煙塵暗楚關全家歸浙右匹馬老兵間
劔

術終難試銘旌復不還故人誰在側魂斷萬重山

山館

偏側不敢怨飛騰殊未能野猿時送果山鬼夜吹燈口
腹久爲累語言難盡憑白頭方檢束飽食愧饑鷹

黃州有警聞從弟銑已過興國度早晚可抵家
戎馬壓黃州君先理去舟艱難千里遠貧賤一身浮宿
將今誰在親王只自謀長江如失險鄉國足深憂

憶從弟鐸

憶昨王師捷還鄉近五年艱危惟我共俯仰得誰憐茅
屋秋風裏烽煙夕照邊亂離今轉甚思爾只高眠

和虞學士春興八首

官河春水湧輕濤來往千艘不用篙江浦女遊遺玉珮
瑤池仙降獻金桃鞦韆拔地煙花暝閭闔中天日月高
早歲功名看得意扶搖風力送鴻毛

鳴珮天階委碧莎雲消太液漲晴波玉盤露浥仙人掌
宮錦花添織女梭王子問安回輦近儒臣進講賜金多

明朝引見狒狼使樂府新傳天馬歌

沙苑煙晴首宿肥朝回天馬錦爲鞵詞臣會送歸青瑣
進士傳呼換白衣雲氣曉依宮樹近春陰晝護苑花飛
君王又進長生藥萬里樓船海上歸

城上觚稜霧靄迷角聲吹徹鼓聲齊雲生水殿龍常現
月滿官松鶴竝棲風俗元存中國舊天文竝拱北辰低
倚樓欲問通霄路誰借青雲百尺梯

萬里驅車入帝關十年棲息一枝安承恩數對麒麟殿

却老何資龍虎丹
金水漲波融雪盡
碧桃分蕊到春闈
江南却憶看紅藥
紈扇羅衣不識寒

清明煙散柳枝斜
宮樹沈沈點白鴉
煖霧撲簾成細雨
朔風吹面射飛沙
江南最憶王孫草
天上催宣宰相麻
十載滄洲孤舊約
鹿車何日共還家

柳林笳鼓曉晴饒
王子春蒐出近郊
雲錦宮袍攢萬馬
鐵絲箭鏃落雙鵑
蒲萄壓酒開銀瓮
野鹿充庖藉白茅
共說從官文采盛
不聞舊尹賦祈招

浩蕩天風駕海航
忍從兒女問耕桑
珠聯魚目知誰識
劍吐龍光不自藏
司馬倦遊曾建節
買臣歸去密懷章
只今豈是無詞賦
材俊中朝少薦揚

賦得越王臺送萬載教司令之官

層臺高與越山齊
南斗諸星入地低
海氣秋澄鴻鴈到
野煙春合鷓鴣啼
官船北走輸珠翠
幕府南開振鼓鼙
側想到官多暇日
登臨長聽玉驄嘶

寄阮弘濟兼簡楊亨衢少府

舊時文物數江東誰似風流阮嗣宗紅袖醉歌金縷曲
牙旂歸導玉花驄神仙元與塵埃隔賓客多應氣槩同
寄語龍泉楊少府園花不減舊時紅

和虞學士登宜春臺

萬家平地擁高臺牕戶層層近日開鶴致瓊花迎帝子
龍持貝葉禮如來雲依老樹秋如畫峽東飛濤雪作堆
惆悵當年歌舞地碧桃開落幾千回

澄虛亭

匹馬江上行且停蒼松夾道風泠泠波光倒吞落日白
雲氣下接炊煙青山僧獨行掃殘葉水鳥雙飛迴遠汀
主人邀客領竒勝賦詩把酒澄虛亭

哭宜春義士彭維凱

并序

維凱復袁州遣迎監郡某元帥以下歸視事守土
將某忌其功遂殺之

風折旗竿卧落暉殘兵揮淚脫戎衣徒聞即墨田單在
不見成都鄧艾歸獻凱何時承寵渥爭名自古抱危機

宜春元帥還相問近報洪州未解圍

宿七里山

并序

十一月二十二日余始得逸歸值臨江兵至楚金
追斬九十九級軍聲始復大振

寒松霧暗月西頽人語無聲鬼語哀郡國忍聞侯景詔
朝廷初棄戴淵才風傳鼙鼓驚魂戰天入鄉關望眼開
骨肉死生俱未卜淚痕血點滿蒼苔

二月二十七日聞故鄉寇退

銅駝荆棘換東風消息南州久不通芳草得春煙漲綠
野棠無主雨飄紅
元帥登壇暇寶玦王孫哭路窮
滿眼親朋總悽惻相逢但索語音同

寄龍子雨

書到山中收淚看出門愁散楚天寬落花春盡休文瘦
細雨更長范叔寒金帶宦情違俗久綈袍交態見君難
欲爲後會知何日酒熟還家得盡歡

贈劉明道

義旗獻凱滿南州君擁兵符控上流
隔岸人煙鄰虎穴中江雪浪送龍舟
劔鳴秋匣玄霜下馬浴晴波紫霧浮
白羽指揮能事集底須萬里始封侯

秋日還山聞南省消息示從弟銓

南國風高聞好音鄰翁酒熟晚相尋
鴈飛漢苑書來往竹暗湘江淚淺深
茅屋暫歸秋四壁柳營煩費日千金
瘡痍早使能蘇息獨抱長貧亦素心

分府同知瑤童相公大閱之日天使適至喜而

賦詩奉寄劉賓旭參軍二首

鼓角緣邊永夜哀使車忽自海南來中朝舊法三章在
大將新圖八陣開玉帳分明傳號令金臺雜選貯賢才
早看送喜麒麟殿五色雲中進壽盃

侯印軍符塞紫衢儒生白髮混混塗兒騎竹馬談兵法
地盡桃源入戰圖雙劍舞間歌激烈一燈愁絕照清癯
山中薇蕨秋風老心折孤邨反哺烏

晚過山莊

草滿畬田落照斜
溪行盡日少人家
自傷直性從干謁
誰在窮途不怨嗟
香火氤氳王子廟
旌旗明滅長官衙
主人問客知名姓
始肯開門喚煮茶

送朱鵬舉照磨赴江西省掾

花外銀鞍鞞紫騮
省郎文采自風流
英雄舊總三千士
美譽新傳十一州
山擁宜春深帶甲
江通章貢小容舟
最趨黃閣參籌畫
願審安危拓遠謀

即事 并序

時監郡尼雅斯拉迪音改除廣西監憲而省都事
吳巴圖爾提軍始至

西上官船日報頻倚門收淚問行人潁川太守終難借
細柳將軍始是眞木落秋高懸殺氣律回寒谷見陽春
不辭斗粟輸軍府但覓山巖著老身

寄劉賓旭

舊日相逢玉雪姿三年幕府鬢如絲波濤入海屠龍苦
風雨還山買犢遲客到定能頻換酒花開應不廢題詩

只憐雙劍牀頭吼又是鄰鷄報曉時

殘年

久愁兵氣漲秋林不謂殘年寇轉深
四野天青烽火近五更霜白鼓聲沈
金張富貴皆非舊管樂人材不到今
江上米船看漸少捷書未報更關心

和周霽海吳鎮撫詩就呈李伯傳明府

牛斗秋高劍氣橫幾人馬上取功名
扇揮白羽臨風迴甲鎖黃金射日明
賈誦自期能料敵山濤誰謂不知兵

官軍蓄銳何時發久厭城頭鼓角聲

風雨舟中作

憔悴江頭路已窮小舟隔岸復相通歸雲亂擁青山樹
飛雨斜穿白浪風避地數年成老醜累人一飯尚西東
憑誰爲息鯨蛟怒容我滄浪作釣翁

感事

荆徐千里混干戈日日君王候凱歌上相出師三月罷
南人待援六年過未休練卒誅求盡暫脫歸囚反側多

獨拜將壇須國士掄材誰似漢蕭何

道逢八十翁

八十老翁行步奔存亡共訴斷愁魂
千金歌舞隨流水
六載干戈棄故園
晚竈燎衣籬竹盡
春牛換米草蓂存
情知青史無名姓
短策猶期報國恩

小除夕

當年臘日還鄉早
弟勸兄酬何怨嗟
腸斷此時同避地
眼穿永夜倍思家
鄉關去鴈渾無信
風雨寒燈不作花

最是五更情調苦城南吹角北吹笳

奉和龍西雨自洪見寄

青樓風月故相干慷慨樽前舞地寬
錦繡春明花富貴琅玕晝靜竹平安
杉關旗鼓元戎勝閩海舟車去客歡
舊日交親應有問一蓑煙雨楚江寒

和寄龍長史

扇外風塵素不干湖光遙送酒船寬
錦箋傳草春詞好銀燭燒花夜枕安
四海交遊空老大百年世事半悲歡

子真谷口深相憶黃獨無苗風雪寒

和寄從弟鐸

畏途阻絕卜支干夕見鄉書意始寬癡腹於人深有累
驚魂從此暫相安弟兄相顧三人在風雨還孤一日歡
春色故園付流水白鷗應怪舊盟寒

和寄從弟銓

腐儒憂國淚闌干江海容身何處寬驚報每愁諸弟隔
臨危但祝老親安對牀風雨長相憶負米晨昏不盡歡

最苦二郎獨冥漠晚煙原上鵲鴿寒

寄從弟銓

舊廬每愛桂花秋風月涼宵足勸酬盜賊未平身漸老
弟兄相望淚空流經年避地魚鱗尾何日還鄉烏白頭
側想早春佳氣好掌珠初見慰深愁

簡王志元

收淚看花花轉紅花前心事想君同幽燕車馬從天下
吳楚舟航與海通貴賤不應懸趙孟去畱終擬報曹公

石田秋雨喧鷄鶩早附冥鴻萬里風

用王冕韻送解元祿茂才

時危結屋傍巖阿野逕春煙匝翠蘿四海俊賢唐貢舉
百年父老漢謳歌山涵霧雨藏元豹水會陂塘散白鷺
地僻此時賓客少松陰掃石坐長哦

寄楊和吉歐陽文周

黃鶴一飛幾千里高標矯矯離風塵宗元有恨爲司馬
郭泰無名與黨人富貴致身何用早是非論事或難真

二君舊日皆知己旅食他鄉莫厭貧

悼已

種竹經年長未齊半枯半死近牕西
天風飄鴈隨雲沒山鬼憑狐當晝啼
世亂獨懷徐庶母家貧久累買臣妻
眼前事事堪腸斷欲問西山路轉迷

春懷

前水推懷後水催推愁不盡載愁來
雪消海上蘇卿老春到江南庾信哀
客路但聞啼鳥樂人情不及野花開

交遊况復疎還往獨對青山勸一盃

社日

甲子頻書入短篇細推五戊卜春田讀書未有平戎策
止酒聊輸祭社錢紅樹花穠春向晚畫橋柳暝雨如煙
舊來歌舞今誰在燕子茅檐只自憐

己亥六月初五日

不惜千金一笑揮危途驚定始傷悲問安慈母翻成泣
乞米貧交不療饑總謂魯連曾却敵謾傳李涉舊能詩

只從鄰曲多豪客無怪荆吳滿戰旗

和友人別怨

風急長空舞落花獨收殘淚莫還家
畫闌砌曲圍芳草綠樹庭空噪亂鴉
不見韓娥沈漢水空傳蔡琰按胡笳
遙知今夕天涯路鄉夢難成月易斜

和劉淵見寄

南國干戈積九年四年相別最相憐
病看菱葉疑非我飢啖松花似得仙
青鳥謾期春後到白雲不掃夜深眠

故人半在無消息讀罷君書倍愴然

晚眺

眼看淮海待澄清骨滿邊城苦戰爭老大不堪思往事
飢寒久已厭吾生煙深薜荔棲烏急風響蒹葭落鴈鳴
惆悵故人書不到別來十載最關情

送從姪淳

路窮淮汴草離離志士空嗟歲月馳敵面人心山萬疊
緣愁客鬢雪千絲風悲洛浦海鳧至月冷漢宮金狄移

從古戰危頻易將君王見事獨何遲

晚秋鰲溪宴集

菊花香滿酒如傾不謂艱危有笑聲
驚座令嚴觥錄事揮毫氣壓楮先生
虛嵐紫翠籠秋色落木紅黃透晚晴
却憶桃源舊時路漁郎重到不勝情

雪中負米晚歸傷題七字句因簡李尚文少府
蕭索風煙暗五陵羣黎愁苦復誰憑
早年識字知何用垂老爲農病未能
負米晚歸沙上雪拾薪寒煮澗中冰

不眠永夜瞻牛斗光怪猶疑劍氣騰

早春試筆

臘雪留寒壓草廬陽春攜煖散天衢喜聞諸將黃金印
共捧中朝赤伏符詩句且題新甲子酒盃不愧舊屠蘇
洗兵雨至應須早半畝瓜田得自鉏

聞龍西雨自閩海間道抵家患目疾缺於展覲
先寄此詩

萬里征帆海上回畏途行盡始驚猜入門兒女牽衣笑

問字親朋載酒來書有浮沈誰與送眼無青白故難開
蕭蘭晚歲俱彫瘁佳句惟應到野梅

和羅習之見寄因簡劉淵

昨日尋君恨不逢離愁散入暮煙中古陂淨瀉秋千頃
歸路斜分月半弓年少向人偏骯髒時危臨事始疏通
論心長欲書燈共無奈君西我復東

二月初晴題淦西居人樓壁

老去才名久退潛樓前晴景逐人添雲連野樹深藏逕

風捲溪花亂入簾，遠信忽傳閩徼外。
閒愁盡挂楚山尖，春光流轉曾相識。
獨怪經年雪滿髯。

三月十三日夜宿淦西山絕頂

夜登絕頂幾千尺，臨曉始知歸路遙。
水滿大江舟窅窅，塵飛客路馬蕭蕭。
山河勢窄如懸網，雲漢光低不作橋。
十二年間多少恨，春來不共凍痕消。

懷羅達則

溪山杖屨每相違，況復經年去不歸。
移席花間春雨至。

倚樓江上莫雲飛鄉書到手兼悲喜世事關心有是非
池上祇今新綠滿待君同製芰荷衣

簡羅伯英

并序

庚寅辛卯年間余與伯英俱客桐江上時有賓從
甚盛自兵亂十四年惟余伯英重到不能不重感
焉

大藥霜髭竟不玄白魚無計滿千仙別離歲月落花雨
歌舞樓臺芳草煙世事榮枯分一日人生感慨萃中年

劉郎恨滿玄都觀重到題詩共幾篇

乙巳夏五月茶陵永新兵奄至遂走淦西暑雨
涉旬米薪俱乏旅途苦甚因賦詩示諸同行

白髮遺民真可哀途窮猶望北兵來關河割據將成讖
將相經綸豈乏材足繭荒山走風雨腹飢深夜吼春雷
主翁清曉催人發又報烽煙逼楚臺

寄宋竹坡

久欲從君借竹看東風又長碧琅玕午陰坐久晴雲落

夜漏眠遲白露溥
韭葉連畦從料理
菊花分選共平安
洞簫一曲裁新管
石上雙吹翠袖寒

和楊茂才閒居

板橋通徑薜蘿深
濃翠浮衣竹十尋
啼鳥漸馴時近客
歸雲不動似知心
翦苔盤石移碁局
添火香篝續水沈
賦筆惟應潘岳好
恨無樽酒與同斟

丁未人日

誤喜新年七日晴
黑光盪日更分明
陰陽元自相消長

夸夏何能息戰爭高視山河分王氣不知金石載虛名
麴生癡癩交情絕看徧梅花晚獨行

荅楊和吉韻

白髮侵尋莫景來掃除無策覆空盃江山每與愁俱到
風雨不知花盡開往事謾存元祐迹少年何羨洛陽才
惟君於我過從近穉子朝朝掃綠苔

訪友人別墅

陰森萬木曉蒼茫路轉山腰問草堂池湧漫波萍葉散

牕涵細雨橘花香讀書程度輸年少中酒心情厭日長
公子飄飄才思闊何妨高詠伴滄浪

和李士周韻

春雲乘雨午橋陰病眼看花負夙心漢水盡堪添綠酒
燕臺何得築黃金手攀楊柳親曾種路出桃源不易尋
畢竟知音眼前少塵埃三尺暗桐琴

寄李亨衢

君住仙壇歸路遙人間塵慮盡冰消微風半脫烏紗帽

明月間吹紫玉簫出水芙蓉鳴翡翠繞牆薜荔護芭蕉
日長應共羅浮客時復松花酒一瓢

和酬宋竹坡韻

寄詩問我山中事性懶家貧一事無春瓮酒香梅未落
午窻夢起鳥相呼舊來叔夜交游絕老去文通筆硯枯
鷗社共盟君未棄何須馳志向伊吾

寄王進士

并序

伏覩前鄉貢進士王禮子讓所刻長畱天地間集

辱收謬作廁其間心竊愧焉而誤名爲昂因筆寄
意

老去羣書逐夢忘青燈白髮夜淒涼平時誰信班生策
落日空懷陸氏莊天爲國家生俊傑地居臺閣盛文章
鄙夫空谷逃名久不謂人間有郭昂

寄贈皇厓壇劉鍊師

壇下溪中山
白石如水晶

神仙宮館近青冥紫翠峰巒開畫屏日射水晶江石白
雲封琥珀嶺松青虎司丹鼎知畱訣鶴立瑤壇聽說經

相約安期今夕至靈風遙想滿虛櫺

病目寄宋時舉

丁丁伐木最關情病起秋風畏客程
隔霧看花生眼纈誓天止酒閉愁城
荒邨茅屋白煙起落日楓林紅葉明
青壁丹崖長在望冷嶂瘦影獨心驚

和荅彭中和

長向春山數別期春花次第報君知
舟迴剡曲緣何事劍合延平在幾時
庭院煖風花氣入池塘微雨鳥聲低

瓮頭酒熟邀誰共，悵望歸雲獨拄頤。

二十六日晴過諶塘

布袍稍覺曉寒輕，晴色偏饒雙眼明。
山逕黃泥攢虎迹，寺門蒼樹挂猿聲。
重來誰與同心膽，老去惟思避姓名。
枯柳橋西曾識面，獨回青眼遠相迎。

和袁方茂才秋夜宴集

下馬階除問錦幃，羅衣花白縷金圍。
月明湖水龍吟細，雲度吳山鴈到稀。
楊柳舞低牙板促，木犀香滿羽觴飛。

袁郎自是風流客舊約秦臺願不違

靜思詩佳句多可存者五言如燈影搖鄉夢雨聲添
客愁天邊春色早窻外莫寒分捆屨山涵雨煎茶竹
送風七言如官酒滿傳鸚鵡盛宮花飛點鸛鵲裘野
迴虹光分莫雨天晴木葉響秋風池浸煖紅花弄影
總涵溼翠竹成科急風亂颭蒹葭雪斜日殘明橘柚
金雲韜月色歸天闕雨壓寒聲欺布袍烏銜朱果珊
瑚碎竹放青梢翡翠迷松下紫苔畱虎跡雨中蒼檜
作龍吟屋前老樹畱雲宿竹外茅亭向水安海棠春
暗飄香盡鸚鵡天寒喚客遲風燕入簾梢落絮雨龍
歸洞駕輕雲千里鴈聲雲外斷一春花事雨中殘竹
徑排墩畱坐客柳塘分水過比鄰鳶敵高風凝不動
鴨分歸路整相排雨中春懶鶯如我花外晚愁鶻逼
人酒送餘春盃滿百月明歸路影成三離愁百斛如
雲散涼意一襟隨雨來殢葉篆從兒學寫松花酒待

客同對風撼竹樓憑雨勢雲歸溪樹作秋陰折花林
動飛紅雨洗硯池虛散紫雲太史未頒周正朔遺民
思覩漢衣冠蔡冠遂煩唐宰相漢儀猶待魯諸生三
邊烽燧晨傳箭千騎弓刀畫繞營客行落日凝愁思
人隔疎煙聞笑聲愁來刁斗聲相續老去屠蘇酒到
遲鄭虔早被才名誤泥錯終期社稷安投暗自慚輕
白壁知音還擬鑄黃金鶴語謾傳遼海樹龍文長想
礪山雲病骨五更秋氣入佳期千里月光同梁震每
稱前進士灞陵誰識舊將軍對酒不辭今日醉看花
却憶去年人汗馬功名知命薄蠹魚文字謾心勞佳
句之多如此而選本
俱不及因為附摘

袁寅亮讀書深山萬木之中以避暑文瞻爲賦

長句因次韻以寄

獨向陰崖結構牢一時文采擅風騷雲間客見疑猶淺
山下人行望始高蒼樹攀巢馴鸛鵲翠藤結蔓挂猿獠
遙知高卧多標致何問長齋代骨毛洗耳未應徒見許
攢眉但恐不容陶山僧進謁多題竹野老相過或獻桃
綿蕪暫陳存故事棘闈嚴備遠周遭鑿平巖罅安書籍
掃集松花釀酒醪醉後賦詩題石壁興來送客釣江臯
蘇門傲睨惟閒笑康樂登臨豈憚勞雨霽傍松延薜荔
晚涼疎水灌蒲萄明朝使者求顏闔只此山中不用逃

題分宜縣橋

雲從溪北生，雨過溪南響。溪上蓑笠翁，倚闌看水長。

重到山家

紅雨長，茶芽東風吹。柳花行人今日到，先自補牕紗。

吳姬別思

霜月五更殘，如何去。又還誤，簪釵鳳小，落在枕屏間。

題春江送別圖

君上孤舟妾上樓，望中煙雨意中愁。江波若會離情苦。

一夜東風水倒流

四時詞四首

煖雲飛撲玉驄歸
簾捲香風酒力微
夜坐久憐明月好
細鋪花影繡羅衣

日射嫣紅安石榴
波涵空翠木蘭舟
美人調笑渡江去
半榻柳風碁不收

鶴認琪花欲下遲
蓬萊仙客遣催詩
情深寫到相思處
秋露芙蓉開滿池

疎林晴旭散啼鴉高閣朱簾窄地遮爲問王孫歸也未
玉梅開到北枝花

訪龍長史不遇

鸚鵡牕深鎖翠寒松花不掃紫苔乾自將名姓題修竹
延桂樓前第五竿

題扇

柳樹晴虹隱畫橋藕花微雨過歸橈波光倒蘸紅樓影
照見佳人弄玉簫

宜春贈別

此首元詩體
要作郭昂

微茫煙浪浦帆開
一曲琵琶淚滿腮
江水不如潮水好
送人東去復西來

辛卯聞徐州警報

塞河詔下選丁男
明日彭城野戰酣
愁殺翰林歐學士
白頭騎馬望江南

發家信

寒硯敲冰帶淚磨
故園消息近如何
老妻不信愁深淺

歸日應憐白髮多

章臺怨

柳繞章臺萬縷金
春風送別最傷心
如今莫問長條盡
并與章臺無處尋

和宋五別後見寄

誤將鸚鵡教詩成
每到人來喚姓名
從此西園蹤迹少
萬絲煙柳鎖春晴

二月十七日有感

花匝疎篁水遶門幾回扶月醉西園青燈昨夜挑殘雨
空認春衫舊補痕

偶興

高柳著花懸紫煙歸舟離恨滿晴川六年杜牧傷遲莫
況復如今二十年

涼夜

竹外涼風畱晚坐驚斷蛩聲山葉隨天河何處是雙星
新月纖纖碧雲破

洞口人家

松樹迴環四五家
機梭長日響咿啞
西風裹得胭脂色
偏與籬東木槿花

秋浦晚歸

芙蓉開後涉波頻
落日迴舟獨愴神
鷗鳥幾回相見熟
故穿菱葉避歸人

對月寄友人

相逢之處月嬋娟
願托襟期共百年
諳盡人間離別苦

始知月自不長圓

四月十五夜對月感舊

早年蹤迹水萍浮
垂老漂流未得休
今夕人情今夕酒
舊時月色舊時愁

妾薄命

孤鸞窺鏡翦情緣
淚血沾襟十五年
誰信舊時歌舞伴
相逢猶自妒嬋娟

四月十五日江上獨行因思去兩年憂患之日

感恨次舊韻

投石滄浪竟不浮
雲林自合早歸休
漁舟點點前江去
載盡斜陽不載愁

六月二十九日觀雨

青山山下是吾廬
六月丘園草盡枯
憑仗西風吹雨去
官田今歲又添租

題龍旗梅

硯冰敲碎碧雲殘
蜂蝶無飛花意閒
記得共尋林處士

嫩寒清曉到孤山

題鄒自春石屏巫山圖

一片屏開十二峰
陽臺去路有無中
午牕香霧籠寒玉
猶似行雲到楚宮

閏十一月朔日山路見梅

蓓蕾微傳春信真
幾回夢想玉精神
不知月落參橫處
猶有孤眠惆悵人

乙巳年余避地彭老家
還再過之候爾十年而

人改物換可感者多矣因賦

舊題塵暗小樓間
花鳥庭空白日閒
鳥自不鳴花自落
客愁何得不相關

贈別

醉挽征衫折柳枝
柳花飛處不勝悲
東風過後西風起
待得青條又幾時

江望

盡把離愁種驛亭
春風吹入草青青
傷心為問行舟客

東過清江停不停

春日憶蕭韶

雲歸長宿北山頭
誤逐東風過小樓
帶得舊時蕉葉雨
數聲敲碎客中愁

寄遠

萬點飛花風外過
紅埋泥土白隨波
閒愁散與傷春客
君在江南想獨多

春日過山家題羅帕

冰絲縷縷繫深恩青鳥飛來每斷魂
畱得薔薇香易滅只從燈下認啼痕

無題

遊絲風煖颭飛花窈窕簫聲隔彩霞
畢竟神仙難換骨自分丹火煮胡麻

有感寄宋五

春夜情濃夢覺空爛柯不省遇仙童
人間翻手恩成怨無怪襄王憶夢中

怨別

病起銀屏滿藥塵
夜窻愁絕月窺人
寒燈不作雙花夢
羅帕啼痕點點勻

元詩選初集卷五十九

欽定四庫全書薈要卷二萬四百二十集部

元詩選初集卷六十

長洲

顧嗣立

編

周霆震石初集

霆震字亨遠吉之安成人以先世居石門田西故
又號石田子初云生於前至元之季宋之先輩遺
老尚在執經考業遍於諸公之廬若王梅邊彭魯
齋龍麀洲趙青山諸公皆器重之科舉行再試不
利乃杜門授經專意古文辭尤爲申齋桂隱二劉

所識賞晚遭至正之亂東西奔走作爲詩歌多哀
怨之音明洪武十二年卒時年八十有八矣門人
私謚曰清節先生廬陵晏壁葺其遺藁曰石初集
老友梅閒張瑩稱其沈著痛快慷慨抑揚非勉強
步驟者所能及近時詩文一變蹈襲梁隋以夸淫
靡麗爲工纖弱妍媚爲巧是皆先生之罪人石初
之序梅閒也亦曰近時談者糟粕前聞或冠以虞
邵菴之序而名唐音有所謂始音正始遺響者孟

郊賈島姚合李賀諸家悉在所黜或託范德機之
名選少陵集止取三百十一篇以求合於夫子刪
詩之數承譌踵謬轉相迷惑而不自知蓋石初天
性介特其持論之嚴固非時好之所能易也

美人昔燕趙

美人昔燕趙歲久江漢間軒牕祭明霞被服羅綺紈
頰怒恒有持含魂詎敢攀一朝強暴陵相從卽歡顏
傾身作歌舞豫恐恩意闌新聲與嬌態取媚巧百端
主家隔

風塵庭宇深且完豈無昔共處永夜青燈寒魂夢各所
依寧復相往還沈沈九秋霜履屨思蒯管娟娟中天月
照影留空山盛世繁無虞末路良獨難棄置勿重陳使
人摧肺肝

濯濯江漢女

濯濯江漢女幽貞出良家十年守空幃夫壻天之涯良
夜秉明燭悉心務絲麻憶昨秋風起河洛昏塵沙傷彼
朱絲絃逸響趨淫哇朝爲御溝柳莫作陌上花世態固

應爾委置勿復嗟所悲在新春雨露凝朝華感此深閉
門淵冰慮彌加藏玉萬仞岡守護盤龍蛇投珠千頃陂
光燄驚魚鰕夫壻會有期豈問歲月賒寸心如皦日終
始宜無瑕

大風發屋雨電交集

大風西北來屋瓦去如走麗譙雙闕壯關鍵決樞紐蒼
蒼泮宮柏枝葉互紛糾移時折偃蹇巧力無措手西禪
鐵浮圖摧仆如拉朽臨江戰樓飛夾巷坊額剖恍疑會

羣龍奮發交怒吼泰山恐崩裂寧復計培塿老夫閉門
卧雨電散牕牖倉皇正衣冠力疾坐良久天威俄咫尺
性命亦何有默悟貴存心淵冰慎吾守

歲莫簡張梅間

憶昔慕遠遊朝華沐春露焉知喪亂後林杪秋葉蠹間
關西州門寒日收踽步尚餘平生友示我廣平賦耿耿
河漢輝幽幽冰雪度終慚媼求悅寧悔貞取妒朗吟發
孤音明月落庭戶世事殊未涯歲年忽云莫有羨君子

心永言金石固

殘髮

殘髮不可紒晨昏日加梳顧慚雨露沐此豈冠冕徒夜
來秋風深傲兀驚頭顱亂離亦已極時序復易徂青燈
一斗酒不樂將何如

哀枉

春心注成漣晝夜深長育枯梢晴自芳寒燒雨仍綠如
何冤死魂不及閒草木

二月十六日晚青兵逼城紅不戰而潰暫匿近

壕小屋夕走橫谿

孤藩酣春霖戰艦一時集喧呼驚棄甲填道戈可拾黃
昏煙燄起近郭俛藏蟄夜深相隨行間道衆岌岌敗走
餘羣醜邪徑俄掩襲叫號互失亡顛仆免繫繫策羸叟
狼顧襁孺婦飲泣帶褌衣苟完靴沾足難給相失但聞
聲疑路翻却立屢休幸鷄鳴襟袖寒氣溼貫魚累童稚
前阻後惶急縈回阡陌間恒恐追騎及重岡釋心掉湛

若恩露裛推挽達人煙開顏見春汲兒扶集悲喜

幼兒
贅橫

溪蕭
氏

親故走迎揖坐定飢渴生酒漿更勸挹驚魂久徐

定強笑寄於悒翻思墮危機性命在呼吸家鄉固殘毀
所幸存井邑杖策歸去來戒此輕出入

古金城謠

并序

國家承平百年武備寢弛盜發徐潁熾於漢淮武
昌南紀雄藩一旦灰滅洪省堅壁寇蔓延諸郡水
陸犬牙北來名將相繼道殞丞相出督步騎直抵

高郵事垂成以讒廢方面多貴遊子弟貪鄙庸才
虛張戰功肆意罔上誅求冤濫慘酷百端重以吏
習舞文旁羅鷹犬意所欲陷即誣與賊通其弊有
不忍言者間存一二廉介則又矜獨斷昧遠圖坐
失機會民日以敝盜日以滋廬壽舒三州屏蔽上
流廬壽旣沒舒獨當鋒鏑之衝至正十年壬申進
士余闕以淮西元帥之節來鎮廣設方略招徠補
葺備戰守豐軍儲賊飲恨不得逞朝廷嘉其功授

淮南叅知政事自是日與賊遇受圍凡四十有二
大小二百餘戰江西賴以苟安坐視弗援十八年
正月丙午城遂陷公一門爭先赴死闔郡無一生
降賊黨舉手加額稱余元帥天下一人購得其尸
城下池中禮葬之傷哉寄痛哭於長歌使後人哀
也

昆侖烈風撼坤軸日車斂轡咸池浴六龍飲渴呼不聞
赤螿元盜厭人肉荆襄弗支廬壽孤江東掃地如摧枯

忠臣當代誰第一七載舒州天下無東南此地關形勝
天柱之峰屹千仞當年赤壁走曹瞞天爲孫吳產公瑾
我公千載遙相望崎嶇恒以弱擊強孤城大小二百戰
食盡北拜天無光當關援劍蒼龍吼盡室肯汙姦黨手
摧鋒闔郡無生降羣盜言之皆稽首堂堂省憲羅公卿
建官分閭日募兵哀哉坐視無寸策遂使流血西江平
向來不曉皇穹意名將南征死相繼一時貪暴聚庸才
玩寇偷安饗富貴河流浩浩龍門西燕山萬騎攢霜蹄

英雄暴骨心未死去作海色催朝雞玉衣飛舞空中見
太息孤忠鏖百戰五陵元氣待天還睢陽誰續中丞傳
斷臂吟

黃埃兒啼夫死官倦遊逆旅心骨酸深閨玉臂辱汗賤
引斧落之身始安紛紛五季窮爭戰迎送君臣如驛傳
天將人紀付女英貞節特從倉卒見傷哉殘形忍顧雛
飲血仰天弔影孤間關痛絕妾薄命行止隨地哀征夫
征衣屢浣憂泥汗招魂不來迫曛莫妾心自割臂可捐

腸斷從夫去時路殘雲低空沒
栖鳥落月不照秋桑枯
泉流出山誓終始取義寧顧千金軀
妾悲望鄉淚頻滴
兒戀母懷啼繞膝一心抱恨向青天
他日山頭願爲石

武昌柳

武昌柳青如許舊恨新愁千萬縷
宮闈去盡野鷄栖憔悴江南誰是主
朔風一夕捲栖鴉春日鷺啼憶舊家
流落王孫重繫馬雨晴天氣屬楊花

李潯陽死節歌

并序

李侯治潯陽之二載紅巾賊發斬黃倚蔡醜爲聲
援勢浸逼郡數告急於省省議調兵武昌興國相
繼沒南北道梗潯陽厄侯力疾獎率民義誓不與
賊俱生郡將悉所部先遁侯轉戰力盡猶持短兵
奮擊慷慨指天父子同遇害嗚呼李侯可謂仁義
之勇矣彼滔滔者獨何心哉侯家潁川名黼字子
威曾祖而下仕皆通顯發身監學泰定丙寅鄉試
魁上都丁卯進士第一死節壬辰春年五十有六

蜀川會漢投匡廬潯陽之厄江西樞李侯仗節忠貫日
存沒誓與城池俱夫何郡將弛練卒世祿忍負私其軀
寇來談笑啓關遁坐使邑井成丘墟侯時力疾短兵奮
臣首當血心當剗魂歸謁帝慟伏闕塗地肝腦民何辜
臣衷願瀝付渠荅臣首欲飛宜僕姑誓堅紅壁殲衆醜
却掃淮蔡匡全吳黃塵四低黑風淡赤豹騰駕蒼蚪呼
山川幾劫鑄英氣上遡古昔誰其徒平原汗馬河北重
江淮安堵睢陽孤顏張凜凜心未死迴立千載誠相孚

况聞有子殊激烈義在從父輕頭顱石頭之袁姑孰下
兩間忠孝何時無紛紛賣降與棄甲仰視汗喘呀長呀
惟公蓋自元氣立顧盼所取皆詩書當年射策首多士
已分一念金無渝勗哉謀國慎所托古今大勇惟真儒

兵前鼓

朝衙操搨出近午莫歸斷續卒三伍鼓聲祇以迎送神
漫把旗旄揭飛虎鋒交昨者沒旗頭今晨隊長血髑髏
貴人按轡不爲動但訝日食無珍羞

領兵官晏出早還
鄉人多以供頓弗



備受
責

戎徒抵掌羣嘲戲志士拊膺殊奪氣朝朝莫莫鼓
鼙鼙蟻聚羶腥了無媿張侯援枹華三周禰衡正色披
岑牟世間壯士古未有此聲慷慨曾聞不

農謠

萬田草生農務忙飯牛夜半飢且僵侵晨荷耒散阡陌
和買犒軍官取將高堂大嚼飲繼燭持遺妻子豐括囊
蒼頭廬兒飽欲死義丁疇敢染指嘗鋤耨漫勞犢方稚
十步九頓空徬徨將軍大笑不負腹東臯南畝從渠荒

布延副使政績歌

并序

壬辰寇陷武昌順流而下省郎中普顏伯華諗於
衆曰若其直擣真陽事未可知儻轉而南無能爲
矣吾受國厚恩發身監學忝進士先誓死必報遣
人間道馳書奉百金歸別父母建議盡撤城外民
居寇始渡江官軍小衄母弟佛奴死之公單騎殿
小橋寇不敢逼衆遂翕從奉平章公道同左丞章
巴延竭志守城逆黨雲集攻圍五十有四日大敗

而還散亡略盡江南遂爲天下雄非公長才贊畫
平章左丞聽用其言詎至是邪朝廷論功除本道
廉訪副使於是公之澤愈無窮矣遠近士大夫爲
公作歌詩頌其美俟太史氏擇焉公世家山東希
古其字也邑士劉子貞近歸自洪具道本末如此
近時有客湖上歸能話郎中身許國朝廷取士數十年
誰謂書生無寸策江州李侯死可書郎中百戰全洪都
昔年廷對俱第一鸞鳳固與羣飛殊當其練兵首陳義

謂賊南征非所忌環城撤屋民始疑事急方知爲上計
家書間道馳山東百金歸報壽乃翁小臣於此誓生死
仰視白日昭其忠朔風雲低吹戰血母弟魂歸寶刀折
倉皇勁氣吐寸心立馬危橋萬夫決相臣攬轡從天回
將軍鞞鼓轟春雷爲公破敵捐萬死顧盼妖賊如山摧
君王聞之加褒異深副當年設科意碧霄雨露湛恩深
官轉霜臺弘國器漢廷寥寥渤海龔廣陵張綱尤罕逢
使君宴坐試深省談笑憲府看平戎

石初集多記元末兵興以來之事最為詳悉鄉先達
陳一德序云江南野史誰復健筆而集中隱約散見
皆可為國史補故
錄其尤者存之

杜鵑行

哀王孫
作也

我不暇自哀古帝魂春來却念今王孫
王孫馬蹄去何處但見黃鶴落日故宇煙塵昏
我昔帝蜀空名存絕憐王孫玉牒尊
春宮天鷲壓酥酪凝香夕帳貂皮溫紫茸
吳姬河西曲白馬怯薛鷹條捫居民咫尺甚
天上冠冕臣僕羣趨奔漢川一炬寇飛度
四載寒食如荒邨暴骸

泣霜關月老恨血埋雨江波渾投鞭七寶委道側落花
送客慚春恩勸歸我亦久流落幾欲出口聲復吞莫道
人生歸去好江南無復弔王孫

過玉成砦

玉成三面堅如鐵穿井無泉援兵絕去年此際萬人登
已是如今髑髏骨刃飛丁壯屠嬰孩婦女分配囊貲財
浪傳古昔險堪恃曠劫竟墮昆明灰我來似涉羊腸坂
道遇遺黎拭愁眼故人何處覓遊魂

陳德新主戰副於
永新罵不絕口而

死
雲樹鴉啼寒日晚

城關西

鷄鳴海東黃塵起
落日關山氣如水
餘民髓竭欲無生
月費給軍須萬計
尚書前時來使臣
近者太守宴將軍

割鮮飲醇互來往
白晝走馬邀紅裙

兵部尚書黃昭奉
詔遠出按兵撫建

間其行營經歷伍闕章安成醫生也
榮遇京師出黃幕
下自撫抵吉以督兵為名
招權納賂郡守梁水寨都事
吳相與玩寇偷安酒食徵逐
無虛日殆承平時所未有
布衣小儒寸心赤
吐吐書

空長太息閭閻無
奈覆盆何
帝禁九重方盱食

海潮吟

北風翻天送高梢
西江浪起如海潮
千艘平城箭飛雨
城潰曾不煩兵交
馮夷啓扉衆爭赴
萬棟煙氛畢方怒
司徒命盡換州營
國公匹馬杉關去
溯流西上旌旗紅
列城樓櫓轉盼空
干戈七載徧宇內
朝野狼顧無英雄
悲哉上下交征利
四維不張巧蒙蔽
憂來却憶賈長沙
痛哭當年繼流涕
豫章逝水通錢塘
漢川北度趨洛陽
洗日咸池佳氣王
聞鷄矯首向扶桑

郡城高

郡城高昔人墮廢今人勞城中居民負土石城上畚鍤

卒伍操去年外壕深地底

吳員外
張錄事

今年內城插天起

紅巾

紅旗東接漢陽小白壁西沈顛江水

江叅
政

杵聲未改築

者殊人事往往如傳車荒碑斷礎悉輿致仙宮梵宇空

無餘歡呼攔街走童孺明年移家城裏住抱關舊卒鬢

如絲淚墮鴉啼城下樹城堅池浚侷金湯此地他年爲

戰場

喜雪 并序

庚子臘月初旬雪再作十九日大雪至二十一日
彌甚深可數尺三日乃止辛丑元日蚤起雪塞門
十三日夜半又雪皆平地尺深喜而賦之

殘年新春凍不開大雲五度漫空來南州病熱已十載
造化有此真竒哉夜聞朔風撼天柱恍惚萬馬隨奔雷
乾坤正氣有先至密運亭毒茲其媒雲旗乍翻搖若水
霜濤却卷飛龍堆女媧廢煉深縮手河伯失據俄驚壓

玄冥振轡祝融遁怒勢欲遣昆岡摧卧龍潛蛟起奔走
舞鶴翔鳳爭徘徊瑤池觴罷酒餘瀝漢皋相贈投瓊瑰
蒼山一夕頭盡白貧戶得句侵晨推朱門豈必異衡宇
埋沒弱柳餘枯梅我疑真宰偶戲劇往往玩世如嬰孩
故將空色種天上大巧六出無根芽要令六合反混沌
寧許萬象蒙塵埃兆豐呈瑞悉餘事解后淨洗昆明灰
西流壺嶠應自反咫尺清淺移蓬萊內廷稱賀論邊事
坐想敕使傳宣催蔡州鷺池久安堵整頓宇宙須雄才

涓人自昔負高見遠去求馬何時回燕山從爾淡一丈
埽地爲築黃金臺

犬鷄歎

雄雞奮翼銜怒蛙蛙被啄取聲咿啞犬來雞斃蛙竟逸
轉步犬驚逢惡蛇兩強相厄須俱殞過客驚怪頻咨嗟
君不見下宮將軍經杵臼綠珠金谷來孫秀世間萬事
每如斯莫負尊前卯時酒

虎墮井

井序 十二月十三日庚寅

神岡距郡十里虎晝攫人轉身竹籬陷入胥井衆
共殪之

郊西猛虎勢莫當攫人白晝來神岡暗中推墮若有物
胥井百尺籬根藏凍泉收聲甃爲土轆轤縵斷苔蘚蒼
眼花誤落爪牙廢棄置有待摧強梁酸風飛沙寒日黃
四郊流血皆戰場乘時吞噬恒妥尾翼以俟鬼高駝翔
北平將軍老且死泰山哭聲哀怨長豈知鑿地古設險
邂逅一蹶由天亡吁嗟此物肆無忌妄意流毒窺城牆

千夫駭汗手莫措造次坎富侔干將君不見東門狡兔
殪牽犬西江孽蛟終自戕貫盈有兆此未悟來者紛紛
投土囊

人食人

髑髏夜哭天難補曠劫生人半爲虎味甘同類日磨牙
腸腹淡於北邙土郊關之外衢路傍旦莫反接如驅羊
喧呼朶頤擇肥馘快刀一落爭取將憑陵大嚼剗心燎
競賭兇觥夸飲醕不知劔吼已相隨後日還貽髑髏笑

陰風腐餘犬鼠爭白晝鬼語偕人行銜冤抱痛連死骨
著地春草無由生睢陽愛姬忍喋血長安仇家俊臣舌
攄忠疾惡古或聞未覩烹魚互吞滅五雲深處藏飛龍
天路艱險何日通皇心萬一憫遺子再與六合開鴻濛

埋冤樹

并序

郡城西郊官道側有樹名埋冤往來必於此少息
因賦託興庶幾有位者聞而動心焉

出城十里西南去行役經過倦休處崔嵬古榦絡蒼藤

相傳此是埋冤樹樹名那得呼埋冤閱人累歲官道邊
朝吁械繫逮詞訟夕敝鞭朴逋稅錢富豪招權逞濫入
孱弱破家哀子立幾人飲恨淚徹泉樹不能言天爲泣
埋冤得名良可悲郡中守令知不知

延平龍劍歌

并序

鄧克明率江西之黨攻延平江州八月破之日鄧
亦大敗奔還死亡甚衆

延平之淵深復淡白日下照蒼龍吟古來此處會靈物

中有未死英雄心黑風一夕噓蜃氣坐看海州俱陸沈
咄哉蝮蛇敢流毒鼓召妖孽紛來侵老龍掉尾纔一怒
百怪灑血腥淋淋書生投筆起大叫稽首再拜皇穹臨
龍兮龍兮爾之潛也已千載豐城故鄉昨失守宜扣天
閣勅牛斗下取老蛟心血剖指揮九日付羿弓馳檄風
雷殲巨醜胡乃坐觀潯陽肆鯨鯢魑魅羣相隨剗
肌剔髓四海靡遂令魚腸豪曹甘毀折岐山之鳳鳴聲
絕忠臣扼腕空白頭赤子拊心眼流血時哉好從檀谿

踊躍起的盧呼取黃熊赤豹來清都并與宋帝獨驅之
長刀龍門將軍天山之三箭神會大冶飛昆吾迅掃六
合塵模糊我當遠求華陰土助爾光芒增快覩問天洗
甲挽銀河蘇息蒼生溥霖雨

山邨

寥落驚回首艱危厭久生野人羞費揖山石苦畱行坡
雨初畦菜園霜未破橙小邨風物古暫喜話農耕

閔隴吟

隴戍通恒代河關控魯齊日經忘國淡天入戰場低玉
帳千羊酪青郊萬馬蹄悲歌頻勸酒送客去安西

寇至

羣醜發禾川中宵羽檄傳才收緣岸戍已漲近城煙掠
貨舟相次毆人騎獨先兒孫猶九口兩地寸心懸

石初集又載喜康子至一首序云幼兒淹滯劉氏館
中夜劫者壞大門而入急呼宿客父子起走出遇寇
二客趨東廂影堂寇追躡之父死子傷吾兒避西廂
匿神龕側幸免死生之異在毫髮間於其來也且喜
且悲其頷聯云及今相見日是汝有生初詞意切至
他如風雨重陽云鷹臺人化前千載鴈塞書沈外九

州中秋云天意未知何日定月華空似昔年來紀事
云天地豈忘心惜但山河未放影分明數語備見亂
離之
慘

雜咏三首

海宇久承平風塵忽四驚官僚生間道黎庶死乘城壯
士天山箭將軍細柳營寥寥千載事憂世與誰評
穎蔡俄中起荆襄轉盼休兵符留北府臣節仗南州萬
宇聲華劫干官富貴羞聖恩覃雨露未必乏嘉猷

所至失堅城宜令鼠輩輕茫茫誰報國草草衆興兵吳

楚縣三戶河山隔上京幾時薊北望飛騎報塵清

卽事

古驛淡春雨荒城帶落暉雞豚當道泯煙火隔江微所
至無完室相逢盡短衣干戈乘劫運暫與聖恩違

羅郭

首義羅明遠傾家郭楚金俊功隨日起遺恨與年淡白
日重泉影青天萬古心如何有位者翻不計浮沈

感遇

病髮梳頻減愁根
日夜深世方迷貨色
天未厭風塵臣
分誰憂國君心本
愛民歲寒餘勁草
灑血贛江濱

寄吳闕章卧病客中

亂山歧路鴈行斜
籬落酣煙菊自花
我昔郡城行冒雨
君今孤館卧思家
濟時孰是囊中穎
避地除非海上槎
一郡幸存唯二邑
戍樓何日罷吹笳

感秋

鬢如疎葉挂林端
帶減腰圍逐月寬
久病秋深心易怯

多愁夜永夢難安
暗蛩入戶輸清苦
落月窺窗進薄寒
屈指青春平

闕

東風隨意馬頭看

九日二首

西風慘淡郡城樓
誰復黃花插滿頭
訪舊愁經墟路曉
登高怕見戰場秋
鳴鸞閣在金笳集
戲馬臺空鳥鼠留
尚欲遠尋雷煥友
提攜雙劍出南州

荒荒萸菊負登臨
莽莽乾坤亘古今
淮浪逆舟寒日淡
楚山連戍暮雲深
孤生自滴思親淚

先父宋淳祐九年九月九日生

多

難誰攄報國心
道路幾時辭
逆旅關河無地避
秋砧

登城

世祖艱難德澤深
風悲城郭怕登臨
九朝天下俄川決
七載江南竟陸沈
馬首空傳當日價
雞聲不到莫年心
雨闕門外青青草
過客魂銷淚滿襟

民哀

痛哭羣庸誤主恩
遺民無路叩天關
荒涼甲第有焦土
倉卒深閨無固門
青血傳餐供士卒
黃金爲土贖兒孫

囊膠誰造昆侖頂念此長河駭浪渾

冰盤雪藕

清徹冰盤壓蔗漿酒酣雪藕近華堂凝寒色映瑤華脆
眞白絲連翠袖香金掌曾聞承玉露瓊臺忽見擣玄霜
文園近日眞消渴莫種蓮根引恨長

和雨困簡張梅閒韻

天氣渾疑挾楚氛雨淫愁向早春聞紅淹小圃違芳信
綠泛回塘亂縠紋遠樹鳥飛邨舍沒淡煙人立野橋分

空餘落旣鄰翁壁顛倒蝸涎似篆文

清和華道士蕭宗元

月滿虛堂奏帝歸仙風吹送紫雲衣
九還欲致三花聚一悟能消萬劫非
老樹鶴棲存夜氣清池魚躍見天機
黃冠免得山陰客未信詩盟與願違

立秋

京洛風塵竟未休送迎爲上敝貂裘
蕭條人物常如夕慘澹乾坤又入秋
勅使經年遺北海戰場近日在南州

紛紛雞鶩羣爭入誰向滄江友白鷗

寇來自北見城中蕭然散入邨落

斷鴈雲低欲度遲鵲巢何許寄南枝寇兵已厭空城住
官馬猶從間道馳萬骨白邊寒月夜孤煙青處夕陽時
經年北道無消息望眼頻穿淚暗垂

次韻劉道原九日

曠劫何當洗塼埃凌高欲藉海為杯巫山雨暗猿相引
汾水雲深鴈不來新釀偶憑茅舍漉寒花時向槿籬開

仲宣幸有荊州託未厭吟邊數往回

懷古

關河渺渺幾浮沈落日秋風萬古心
二項留人輕六國一壺玩世重千金
亂來耆舊傳聞泯老去英雄悔恨深
翰與蘇門長嘯者不教車馬浣山林

擬復愁六首

一燼城門火餘灰已復寒小兒爭炙手猶作燎原看
殺氣頻年盛南昌接武昌帝城春有路昨夜夢錢塘

旌旆簇雕鞍花袍紫鳳團
路人潛側目敢謂沐猴冠
天驥鹽中蹶瑤釵井底沈
如何起阡陌坐致萬黃金
屏迹譙樓下淡追少壯時
卧聽更漏鼓雙淚落如絲
徙封餘赤螿逐氣布青蠅
欲市金臺駿黃河又不冰

戲筆

西園蹴鞠醉蒲萄
北里琵琶紫錦條
堪笑東家頭白者
一燈淡夜讀離騷

北山口號二首

蘄黃連結蔡州城風靡江東莫敢膺千里南來今送死
天知忠節在廬陵

天嶽東回納贛川山峰斷處是青天螺湖橋下清流
水
雷向槎灘送戰船

軍中苦樂謠九首

半臂纏腰帽卷氊剪裙荷葉腿齊編市西橋外看屠狗
笑擲并刀賭酒錢

堆帽紅纓間黑纓粉青宦袴短黃裙酒樓突過行人避

近日新充水砦軍

旌表門前路幾彎浮圖坡下日銜山馬上長身單白紵
雙雙緩轡打毬還

短髮風欺破帽斜日西洗足踏紅沙妻孥待哺不遑卹
流汗擔柴赴主家

疊石支牀擁敗氊抱關擊柝日隨緣松燈自抱芒屨了
要辦明朝買菜錢

劍鋒交處奮身跳箭集征袍血未消奪得紅巾衝陣馬

歸途乾被長官要

官船公子抱琵琶
笑指娼船白藕花
今夜江頭好風月
買魚載酒宿誰家

團扇題詩愛越羅
畫船載酒沸笙歌
何人夜讀張巡傳
獨占秋江月色多

十里長洲列戰船
白頭吟客坐看天
何時得見三階正
獨寄蓬牕夜不眠

宿州歌

客有自中興來能言四川聞亂遣兵出
援主將日置酒高會收其子女玉帛而

西宿州南北之咽喉也知州廉能在任十二載遠近歸心因不納拜見之禮責以軍前供給知州既行宿州遂陷

萬騎連雲發蜀都宿州一擲似擣捕幕僚摺得流星檄
牙帳朝酣睡未蘇

楊柳枝詞四首

并序

偶憶丁酉春客自邑中來誦王大初一絕落句云
多情只有城南柳舞盡長條更短條蓋指失身而
事修飾者戲續之

離宮別館短長亭，忘却江南舊日春。
是處人家種楊柳，往來繫馬解留人。

背立東風淡畫眉，斷腸煙雨一枝枝。
隋宮漢苑春無主，莫向江南話別離。

移栽楊柳受風多，南畔行人北畔過。
莫道浮萍是飛絮，好隨流水到官河。

舞絮含愁入酒家，何因得近瑣窗紗。
春風萬一無拘束，放去錢塘逐落花。

籬間小花

小小閒花分外紅
野人籬落自春風
江南多少繁華地
盡在寒煙蔓草中

雨中


柳塘分路市橋斜
海燕雙飛識故家
一自閉門聽夜雨
隔牆落盡碧桃花

元詩選初集卷六十

謹案五十九卷第三十三頁後一行尼雅斯拉迪
音舊作納速兒丁吳巴圖爾舊作吳八都刺今
並改

六十卷第十頁前一行布延舊作普顏今改 十
頁前八行巴延舊作伯顏今改





總校官候補中書臣吳紹潔
校對官編修臣馬啟泰
謄錄監生臣鄧椿